

MOELETSI OA BASOTHO

M5.00

PARARE DOMINO PLEBEM PERFECTAM



O khutlisa tšepo
ea baithuti

5

O ema le Basotho


5



TRC E LOMAHANTSE MENO

www.moeletsioabasotho.co.ls

Moeletsi oa Basotho



Re se re fumaneha ho
marangrang

Email: newsroom@moeletsioabasotho.co.ls
Tel: +266 28350466/ Whats app: 62600983

MOELETSI

Lesotho le hloa mekoalaba

Naha ea Lesotho e khethetsoe ho ba mohokahanyi bophatlalatsing le botlalehing ba litaba tsa paramente tikolohong e ka Boroa ho Afrika, (APPN). MISA Lesotho e re khetho ena ea Lesotho boemong bona ke pontšo e hlakileng ea hore bo-ralitaba ba Lesotho ba na le bokhoni bo amohelang machabeng. E re sena se bontša hore menyetla ea bo-ralitaba ha e felle Lesotho feela.

MISA e re baphatlalatsi ba sebetse litaba tsa sechaba ka 'nete eohle, ba se ke ba khetha batho kapa ho nka mahlakore, empa ba itšetlehe ka melao-theo ea boitsoaro oa bo-ralitaba.

Ea khethetsoeng ho ba mohokahanyi o bontšitse hore Basotho ba tla lula ba e-na le leseli ka mesebetsi, liqeto le melao e fetisoang paramenteng, ba be le matla a ho etsa liqeto tse nepahetseng tse ntlafatsang bophelo ba bona.

Bophatlalatsi ke letsoho le letona la naha ka 'ngoe, hobane bo thusa 'muso ho fetisa meletsa le ho phatlalatsa sechaba litaba ka nako. Re thoholetsa haele mona ho etsoe hloko hore taba ena e bohlokoa.

Matona a 'muso oa Motlotlehi a ile a tsoa letšolo ho etela likolo ka ho fapakana naha ka bophara, ka sepheo sa ho ea tsosolosa barutoana le ho ea ba abale limpho tse kenyeletsang lieta le seaparo sa sekolo, haholo ba hlohang. Taba ena ea ho etsa 'Back to school' ke moreo o eteletsoeng pele ke Lekala la Thuto le Koetliso la ho khothaletsa barutoana ho ea sekolong, ho fokotsa ho tlohela sekolo ka lehare le ho totobatsa bohlokoa ba thuto.

Thuto ke motheo oa kholo ea moruo oa naha, kaha e aha bacha ba nang le tsebo, boitlamo le bokhoni ho iketsetsa mesebetsi le ho kenya letsoho ntšetsopeleng ea Lesotho. Barutoana ba ile ba hlalelloa ka malebela, mohlala; kotsi ea tšebeliso ea lithetefatsi, ho se senye menyetla ea ho ithuta. Taba ene e bontša hore 'muso, likolo le sechaba ha li sebetse 'moho, thuto e ka matlafala Lesotho. 'Me barutoana ba khothaletsoa hore thuto e tsamaee le temo, etsoe ba ke ke ba ithuta hantle ba lapile.

TRC e lomantse meno ka ho hloka melao ea bojalefa e sireletsang basali, kahona ba ntse ba anaetsa thuto ka litaba tsa kabo ea mobu. Ba bile le lipuisano le bachang ba tšola ho susumetsa ntlafatso ea maano a shebaneng le tšireletso ea litokelo tsa basali kabong ea mobu oa temo. Ho banahala basali ba behelloa ka thoko lithong tse ngata haholo ha ho etsoa liqeto.

SAILER e re Lesotho joaloka ka lina tse ling tsa lefatše, le tsoanetse ho akofisa le ho amohela mekhoea e mecha ea ho etsa chelete. Joang haele hantle? Ka ho sebelisa monyetla e tlišoang ke phetoho ea boemo ba leholimo, ho kenyeletsa tlhahiso ea matla a sa silafatseng tikoloho le thekiso ea moea o hloekisitsoeng (carbon trading), o ka sebelisoang ho tšehetsa litsing tsa bophelo, tlhahiso ea mesebetsi le ntšetsopele ea moruo oa naha.

Phetoho ea boemo ba leholimo ha e sa le taba ea bokamoso, empa ke boemo bo seng bo ama bophelo ba Basotho ka kotloloho. Lintho li ngata tse kenyang letsoho phetohong ena; tšebeliso ea libeso ho pheha, ho chesoa ha mashala, tšebeliso ea mafura a likoloi, le mosi oa lifemeng, 'me tseo tsohle li eketsa tšilafalo ea moea sepakapakeng. Taba ee re ka e qoba joang?

Khothaletso ke hore Lesotho le tsetele ka bohlale mefuteng ena e mecha ea moruo, e le ho fokotsa bofuma, ho hlalisa mesebetsi le ho ba mohlala oa ntšetsopele e lumellanang le tikoloho.

MOLIMO A BOLOKE LESOTHO LE BASOTHO

Lesotho le ntlafatsa khokelo

Nthabeleng Seitlheko

Internet Society Lesotho ka tšehetso ea ISOC e thakhotse Lesotho Internet Exchange Points (LIXP), eleng sethala se secha se tla fetola ka ho felletseng tsela eo Basotho ba hokelang marang-rang ka eona. Mohato ona ke oa bohlokoa haholo bakeng sa naha, kaha o tliša marang-rang a potlakileng, a fumanehang habonolo, le a theko e tlaase ho sechaba ka kakaretso. Tsena li bile ka la 27 Pherekhong monongoaha.

Mookameli oa Morero ona, Monaheng Diaho, o hlalositse hore naha e ne e ntse e sebelisa lekuka la marang-rang la 2011, le neng le se le sa lekane le litlhoko tsa kajeno. Lekuka lena le ne le sa khone ho tsamaisa data e ngata, marang-rang a khaoa hangata, 'me batho ba ne ba imeloa ha ba sebelisa marang-rang, e leng ho

bohle ba atlehe ho hokela marang-rang ka potlako le ka mokhoa o sireletsehileng.

Morero ona ha se feela ho ntlafatsa khokelo ea marang-rang, empa o boetse o shebane le ho matlafatsa litšebeliso tsa sechaba, joaloka thuto, libanka, litšebeliso tsa 'muso le tsa bophelo, ka ho hokahanya batho ka sethala se le seng. Sena se qobisa batho ho ikhokella marang-rang. Se fokotsa litšenyehelo, 'me se tliša phetoho tšebeliso ea marang-rang bakeng sa Basotho bohle.

Molula-Setulo oa Internet Society Lesotho, 'Maneo Maphorisa, o hlalositse hore sethala sena se tliša hore marang-rang e be a potlakileng, a fumanehe habonolo ka theko tse tlaase, e le ho matlafatsa khoebo le khoebisano lipakeng tsa sechaba. "Se tla nolofalletsa Basotho ho etsa mesebetsi e fapakaneng, ho sebetse marang-rang, ho fumana litaba tsa bohlokoa, le ho theha

khaoloa linaheng tse ling."

Mokhatlo oa internet Society o boetse o bontšitse hore Lesotho le tla ba le matla a ho laola data ea eona kahare, e le hore leha linaha tse ling li ka khaola marang-rang, Basotho ba tla lula ba na le khokelo e tsitsitseng. Sena se tla matlafatsa boiphihlelo ba Basotho, ho eketsa menyetla ea khoebo le ntšetsopele ea moruo, 'me se tla fetola tsela eo naha e hokahanang ka eona le lefatše.

Mohato ona ke tsebo e kholo ea marang-rang, a tla thusa Lesotho ho fihlele lebelo le phahameng la khokelo ea marang-rang, boiketlo bo eketsehileng, le monyetla oa ho kenya letsoho moruong oa marang-rang.

Ho hlakisa Lesotho Internet Exchange Points, ke mohato o tla fetola bophelo ba Basotho ka kotloloho, ho tloha thutong, boitekong ba khoebo, ho isa litsing tsa bophelo bo botle, ho netefatsa hore data e bolokehile, 'me ho etsa hore ho hokahana le lefatše ho be bonolo.



bakang tšitiso.

Ho rarolla mathata ana, mokhatlo o rekile thepa ea boleng ba M400,000 le ea M692,000 ka tšehetso ea ISOC. Diaho o ile a phaella ka hore thepa ena e ncha e tla arabela tlhoko ea batho ba sebelisang marang-rang kajeno, 'me e tla ntlafatsa maqhubu le tšebetso ea data ho etsa hore Basotho

menyetla ea moruo ka potlako." O hlalositse joalo.

Lerato Mokuku ho tsoa LCA o ile a phaella ka hore, ba motlotlo ka boteng ba thepa ena hobane e tla etsa hore ntlafatso ea khokelo ea marang-rang e be bonolo, Basotho bohle ba une molemo, 'me naha e lule e hokahane le lefatše ka bophara, leha marang-rang a

Ka mantsoe a mang, Lesotho le tliša ba le marang-rang a matle, a fumanehang habonolo le a sireletsehileng, Basotho bohle ba tla bona melemo ka kotloloho. Sena ke mohato oa bohlokoa o tla fetola bophelo ba sechaba, ho matlafatsa khoebo, ho holiisa thuto le ho boloka data ea naha.

Contacts: +266 28350 466

62600983 WhatsApp

Email: newsroom@moeletsiabasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

EMAIL: editor@moeletsiabasotho.co.ls

sub-editor@moeletsiabasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

Tšelis Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404


TRC e lomahantse meno

Nthabeleng Seitlheko

Ele ho ntlafatsa le ho khothaletsa ntlafalo ea maano litabeng tsa tsireletso ea litokelo tsa Basali kabong ea mobu oa temo, Mokhatlo o Loanelang Litokelo tsa Mantlha tsa Botho (TRC), o bile le lipuisano le bachang ba tšola ho susumetsa ntlafalo ea maano, ka la 28 Pherekhong monongoaha.

Adv. Mabela Lehloenya o re 'moka ona ba u tšore hobane ba qholitsoe ke hore boemong ba maano batho ba sebetse ka likarohano eleng ho etsang hore ho be thata hore ntlafalo ea basali temong haholo litokelo tsa bona li bonahale li ananeloa.

O re ba hloka ho sebetse 'moho ho koala likheo tse teng litabeng tsa litokelo



tsa basali mobung. Basali ba tobane le qholotso ea ho ba le mobu oa temo hore ba tsebe ho lema ka bolokolo-

hi. A re le temong ea liphoofole ba lokela ho fuoa litokomane tse nepahetseng tse ngotsoeng mabitso ka

bobeli. Basali ba ntse ba tobane le qholotso ea litaba tsa lithuso tsa lichelete hore ba kenele khoebo le tlhokahalo ea mebaraka

A re ka thoko ho mona ba lomahantse meno ba hloka melao ea bojalefa e sireletse basali ho anetsoe thuto ka litaba tsa kabo ea mobu, hobane ho bonahala kutloisiso e le sieo. Basali ba hlalhe kahar'a litokomane tsa mobu oa temo e le hore ba nolofaloe ke ho o sebelisa joaloka banna ha ba lokolohile.

Lineo Monethi, ho hlaha morerong oa Wool and Mohair Value Chain, o hlalositse hore ba na le morero o moholo oa ho shebana le ntlafalo ea basali le bacha, bacha ba 30%, ha basali e le 50%, morero ke ho ba ntlafatsa hore ba kenelle liqetong tse kholo tsa liphoofole le moruo haholo ba ka maloting, boholo basali ba nka boikarabello ka liphoofole empa e se tsa bona.

O re leha ho le thata hore ba kenyeletse basali haholo litabeng tsena hobane boholo ke khoebo e sebetsoang ke banna. Ba tla sheba haholo Seterekeng sa Mokhotlong, Maseru e ka Maloting, ThabaTseka le Quthing hobane ho hlokomelile hore ke libaka tse nang le liphoofole tse ngata empa tseo tlala e bonahalang e atile ho tsona.

A re ba hloka ho bona basali ba kena tšebetsong ea likiring ba kute le ho hlahloba boea, le ho bona hore ba thibela litaba tsa khatello mesebetsing moo ba tla fana ka litofo tse 10, 000 tse ntlafetseng ho ba etsetsa mesebetsi e bonolo.

Moemeli oa Setsi sa Ngoliso le Tsamaiso ea Mobu (LAA) Adv. Matšelis 'Mota o hlalositse hore molao oa Legal Capacity of Married Persons Act of 2006 o thibela monna ho rekisa setša a le mong kapa mosali a le mong ba lokela ho etsa liqeto ka kopanelo. O re melao eohle e teng empa e bonahala e thotse kabong ea mobu oa temo haholo masimo. A re batho ba fumaneng litša masimong ha ba atlehe ho fumana mangolo a ngoliso ea litša kaha mobu oo o hloailoe e le oa temo.

Itumeleng ho hlaha Mokhatlong oa Lihoai tse ntseng li Thuthuha (SADP), o re morero oa bona ke ho bona hore ba thusa lihoai ho ntlafatsa temo, ho sebelisa mekhoha ea morao ea ho noesetsa le hore ha ba ile ba hlalisa, ba hlalitse tse ho rekisa. A re bona e le SADP ha batho ba hloka ho tlatsetsoa ka lichelete ha ba khethe nku ka pere kaha litokelo tsa basali le banna li sebetse ka ho tsoana.

Bosiu Semanyane ho hlaha Lefapheng la Likoporasi Lekaleng la Khoebo le Mesebetsi e Mehlo, o hlalositse hore basali ba bonahala ba ena le seabo se seholo litabeng tsa likoparasi le boikopanyo, 'me ba fumana bosupisi lekaleng. A re bona ha ba shebane le basali ka kotloloho empa ba sebetse le bohle.

Lira Theko o lebohile bohle ba bileng 'mokeng ona, a khothaletsa hore boiteko ba mekhatlo e teng ea basali metseng e eloe hloko le hore ba kenelle kahar'a liqeto tse amang litaba tsa temo le kabo ea mobu.

Litaba tsena li latela Morero o Moholo oa TRC e keneng ho ona oa ho sireletsa Litokelo tsa Mantlha tsa Botho, haholo tsa basali temong.

O ema le Basotho

Nthabeleng Seitlheko

Letona la tsa Machabeng, Mohlomphehi Lejone Mpotjoane o re ha ho sa tla ba le bothata phanong ea litokomane tsa baithuti ba fumaneng monyetla oa ho ea ithuta Afrika Boroa, kaha Ntlo ea Boemeli ba Naha ea Afrika Boroa e tiiselitse lekala hore marang-rang a se a khutletse tšebetsong, 'me a sebetse ka tsela e khotsofatsang. O boletse tsena, 'mokeng oa bo-ralitaba oa la 27 Pherekhong monongoaha.

O re o nka ba fihletse katleho e kholo tharollong ea bothata boo. O re ba tsebisisa sechaba haholo-holo baithuti ba ithutang kapa ba ikemisitseng ho ea ithuta naheng ea Afrika Boroa, hore ba eleletsoe ka ho tšoenyeha le tiehiso e bileng teng phanong ea litokomane tsa ho ithuta mekhahlelong eohle ea likolo.

O re tiehiso ena e neng e sa lebelloa e bakiloe ke bothata ba tsamaiso ea marang-rang ao Ntlo ea Boemeli ba Afrika Boroa Lesotho e bileng le bona matsatsing a morao tjena, o re lekala le hlokomela hore boemo bona bo tšoenyeha esita le ho baka tsitsipano e kholo ho baithuti le batsoa-

li, hobane ngoliso e se ntse e tsoelapele likolong ka ho fapakana.

O re hang ha taba ena e se e fihlile tlhokomelong ea lekala, mehato e potlakile e ile ea nkoa ho buisana le Ntlo ea Boemeli ba Afrika Boroa Lesotho, ka sepheo sa ho fumana tharollo ea nakoana e ka sireletsang lithahasello tsa baithuti ba Basotho.

A hlalosa hore ho ile ha lumellanoa hore lengolo la se-mmuso le ngolloe Ntlo ea Boemeli ba Afrika Boroa, le kopang litsi tsa Afrika Boroa hore li se ke tsa behella baithuti ka thoko kapa tsa ba qhelela kante ha ho ntse ho lokisoa mathata a tsamaiso le marang-rang.

Litaba tsena li latela hore batsoali ba bana ba amohetsoeng likolong tsa thuto e phahameng Afrika Boroa, ba re lesisitho la Ntlo ea Boemeli ba Afrika Boroa phanong ea litokomane le baketse bana bothata, ka ha hona le bao likolo li seng li koetse ngoliso ea bana, tse ling bafani ba hutse litšiane tsa bona.

Ba re tse ling bolulo bo tletse, likolong tse ling li fane ka mohau oa beke ena feela hore bana ba ngolise.

E mong 'Maneo Phakela o hlalositse hore o tšoenyehile kaha ngoana oa hae a ne a fumane sekolo naheng ea boahelani ka lebaka la ho lieha ho fumana tokomane e mo lumella ho kena sekolo naheng eo, ngoliso e

koetsoe.

O re ke ntho e bohloko ho bona bana ba salla morao ka mathata a sa bakoang ke bona, empa e le boemo

bo neng bo hloka puisano ea linaha tse peli. A re leha ho le joalo, ba ntse ba leka methati eohle ea hore ba thushe hore ngoana a qetelle a atlehele ka hoba le bopaki bo tšoarehang bo bakileng tšitiso.



Mazenod Tailoring
tailoring@mazenodprinting.co.ls
22 350 224
+266 50757585

Transforming your image is our Passion

Readily available

MOELETSI O TŠEHETSA BACHA



Tšeliso Thakholi

Boqapi ba ho khabisa liphahlo ka ho li ngola le ho taka litšoantšo ka mefuta ke talenta eo bacha ho bonahalang ba ena le thahasello e kholo ho eona matsatsing ana, empa ba sena leseli la hore ba loke-

la ho latela methati e fe e nepahetseng ho tsebahatsa tšebetso ena ea bona. Ka nako e 'ngoe thahe-sello ea bona ea ho ngola le ho khabisa liaparo e qetella e fela kapa ba khetha ho ipolokela eona, ebe ha e tsoele sechaba molemo. Leha liqholotso li bonahala li le ngata haholo tse aparet-seng bataki ba liphahlo,

abuti Rethabile Mosese o ntse a tšoare ka matla hore a hlhelle botaking ba liphahlo ka mefuta. Mosese har'a mesebetsi e mengata eo a etsang e kang ea ho roka liphahlo, o ikhetholla ka talenta ea ho khabisa, ho ngola le ho taka litšoantšo ka mefuta eohle ea tsona. Hantle ka tšebetso ke 'Graphic designer', empa ka lebaka la lerato la ho ba setaki sa liphahlo, o qetelletse a thehile kampani ea pele ea mofuta oa eona e bitsoang Media 86 PTY LTD, e leng eona e khabisang liphahlo ka makhetha a maholo, e thehiloeng ka 2016. O se a ngotse le ho khabisa mefuta e mengata ea liphahlo.

QHOLOTSO EA HO QALA KHOEBO

Hantle ha ke tla theha kampani Media 86 PTY LTD, ho ne ho hlile ho sena ntho e nqhololitseng, empa ke ne ke khannoa ke lerato la mesebetsi ona o motle oa ho ngola le ho khabisa. Le leng la mabaka ke hobane litsebo tsa ka ke tsa 'Graphic Designer' e leng eona ntho eo ke etseng se-

kolong. re ena le bareki ba baholo ho hlaha linaheng tse kang Malawi le Afrika Boroa. Ho lieha ho lefa ha bareki ke eona qholotso ea rona e kholo. Ho feta mona re na le khaello ea lichelete hoo ka nako e 'ngoe le ha rena le mesebetsi o mongata re sitoang ho o etsa kaha ho se bonolo ho libanka hore alima lichelete. Re boetse rena le basebetsi bao hangata ba sa tšepahalleng mesebetsi oa bona ka ho o tlohela ka lehare ba re ba ea makhulong a matala.

TŠEBETSO EA KAMPANI

Kampani ea haeso hantle e sebetse ka ho ngola matšoao a likhoebo, ho hatisa lipampiri, ho hatisa liaparo le ho ngola matšoao a makoloi. Ka hlimo ho tsohle re boetse re roka liaparo tsa sekolo ka makhetha a maholo. Haele hantle mesebetsi oa rona oa mantlha ke ho ngola le ho khabisa liphahlo ka litšoantšo.

Tlas'a mokhabiso oa liphahlo le ho li ngola re na le ntho e bitsoang Mosotho Wear, moo re etsang lipoti ka mefuta, likipa, likausi le mese, hona ho eona Mosotho Wear re etsa lihlahisoa tse tharo, e leng Mosotho Wear, likipa tsa leeto la Moshoeshoe le likipa tsa bana tsa liboko. Likipa tse na tsa liboko re li etsa ka lebaka la hobane re batla hore bana ba hole ba itseba le hore ba be motlotlo ka liboko tsa bona.

LIKATLEHO LE LIQHOLOTSO

CHEBELO PELE

Re batla ho bona 'brand' ba rona ba Mosotho bo holile ho feta mona, bo fumaneha naha ka bophara. Re boetse re batla ho bona bo pharalla le Afrika eohle e seng linaha tsena tse peli feela.

KELETSO HO BACHA

Taba ea bacha ba lutseng hae hobane e hlile ho se na mesebetsi ba bile ba sa tsebe le hore na ba ka qala joang e teng. Empa ke ba khothaletsa hore ba etse se haufinyane se ka etsa-



Katleho e kholo eo nka reng se re e fihletse ke ea hore e be kampani ea haeso e ntse e phela le kajeno kamor'a ho feta maemong a boima a ileng a sisinya lefatše a COVID-19. Kampani ea rona e se ena le seriti le tlhompho e kholo, hoo batho ba tlišang thepa ea bona ho rona le hore re se

halang metseng ea habo bona, hoba ha se kaofela re ka iphumanang re se re qalile mesebetsi ea litoro tsa rona kapa seo re batlang hore re se etse bophelong. Haeba hona le mekhoe e it-seng eo o ka e etsang e ka o thusang ho fihlela toro ea hao e etse mocha oa haeso.

Shelile o khutlisa tšepo ea baithuti

Nthabeleng Seithleko

Letona la Khoebo le Ntšetsopele ea Likhoebo, Mohlomphehi Mokhethi Shelile, o ile a ikopanya le baithuti, litichere le sechaba sa Lithabaneng moketeng oa Letsatsi la Sechaba la 'Back to School', e leng morero o etelletsoeng pele ke Lekala la Thuto le Koetliso (MOET) ho khothaletsa ho ea sekolong, ho fokotsa ho tlohela sekolo le ho totobatsa bohlokoa ba thuto.

H'a bua ketsahalang eo, ka la 27 Pherekhong monongoaha, Letona Shelile o hatelletse hore thuto ke motheo oa kholo ea moruo oa naha, kaha e aha bacha ba nang le tsebo, boitlamo le bokhoni ba ho iketsetsa mesebetsi le ho kenya letsoho ntšetsopeleng ea Lesotho. O ile a boela a lemosa baithuti ka likotsi tsa tšebeliso ea lithetefatsi, a re seo se senya bokhoni ba ho ithuta, se fokolisa bokamoso ba bacha 'me se ama sechaba ka kakaretso.

Letona le boetse la ipiletsa ho batsoali le bahlokomeli hore ba tšehetse bana ba bona ka ho ba khothaletsa ho ea sekolong, ho ba tataisa le ho ba ema nokeng, kaha thuto e le lefa le ke keng la amohuoa motho.

O ile a aba limpho tse kenyeletsa seaparo sa sekolo ho baithuti ba ipabotseng e le mokhoa oa ho ba khothatsa le ho ananela boikitlaetso ba bona.

Molula-Setulo oa Boto ea Sekolo sa Mathomo sa Makoanyane, 'Mamotloang Mamofolo, o ile a leboha Letona ka ho hopola likolo tsa Lithabaneng, a re thuto ke lefa le sa boleng, le fang bana bokhoni ba ho iketsetsa liqeto tse nepahetseng, ho sa natse maemo a malapa ao ba tsoang ho 'ona. O itse hoa thabisa ho bona hore kajeno thuto e phahamisitsoe, 'me phetoho e tlišoa baneng ba sechaba, haholo ba tsoang malapeng a hlohang.

Lebitsong la baokameli ba likolo tse 6 tse bileng karolo ea mokete ona, Mookameli oa Sekolo se Phahameng sa Lithabaneng, Ntombi-zodwa Jamangile, o itse ba motlotlo ka tšebetso ena kaha bana ba bangata ba qetella ba sa phethele lithuto tsa bona ka lebaka la bofuma, ho haella ha tšebetso le ho ikutloa ba nyenyefetse har'a ba bang. O hlalositse hore tšebetso ena ke matlafatso e kholo

ho baithuti, hape ke mohato oa tšireletso le polokeho ea bana, kaha e ba fa tšepo le boitšepo ba ho tsoela pele ka thuto.

Ke hona moketeng ona moo baithuti ba 21 sekolong ka seng ba ileng ba fuoa tsa lijo, e le ho fokotsa karolo ea mathata a ba sitisang ho ea sekolong ka mehla. Ho feta

moo, maqheku a tikoloho ea Lithabaneng le 'ona a ile a fuoa thuso, e leng pontšo ea hore morero ona o shebane le boiketlo ba sechaba ka kakaretso, eseng bana feela.

H'a bua lebitsong la baithuti, Tšepiso Moiloa o bontšitse thabo le teboho, a re baithuti ba motlotlo hore

ebe ho ntse ho e-na le batho ba ba hopolang, kaha bana ba bangata ba sitoa ho kena sekolo ba phutholohile ka lebaka la bohloki, ho haella ha lijo le liaparo. O itse thuso e fanoeng e ba fa boitšepo, seriti le tlhompho, e ba etsa hore ba kene sekolo ba thabile, ba itšepa ebile ba ikemiselitse ho ithuta.

Tšepiso o phethetse ka ho leboha Letona Shelile ka ho tliša tšepo le seriti bophe-long ba bona, a re ketso eo e fetotse maikutlo a bona ka thuto le bokamoso ba bona.

Mokete ona oa 'Back to School' o bontšitse ka ho hlaka hore ha 'muso, likolo le sechaba li sebetsa 'moho, thuto e ka ba matla Lesotho.



Makoanyane e bula sekolo sa likonyana

Nthabeleng Seithleko

Mookameli oa Sekolo sa Mathomo sa Makoanyane, Monghali Thabang Rankoe, o boletse hore le ha thuto e sa lefelloe, sekolo se ntse se tobane le bothata ba baithuti ba nyahlatsang sekolo ka lebaka la bofuma, tlala, tlhokomelo e fokolang ea batsoali le khaello ea mesebetsi malapeng. O boletse tsena pušanong le Koranta ka la 26 Pherekhong Monongoaha.

O hlalositse hore ho bile le ketsahalo eo moithuti a ileng a tlohela sekolo ho ea sebetsa moo ho hlatsuoang likoloi ka lebaka la tlala e lapeng. Rankoe o boletse a supa hore ho fetoloa ha bolulo khafetsa ke batsoali, ke e 'ngoe ea tse amang thuto ea bana hampe. O itse leha

ho e-na le bana ba ipatang tseleng ba sa rateng sekolo, le batsoali ba teng ba sebet-sang ka thata ho netefatsa hore bana ba bona ba khutlela sekolong.

O tsoetse pele hore bohlo ba baithuti ba tsoa Tšenola, nakong ea lipula tse matla ba sitoa ho fihla ke likhohola, mangope le khaello ea litsela, seo se etsa ba be morao lithutong. "Sena se ama thuto haholo, bana ba qetella ba kikitlala," a rialo.

O boetse a bontša ho tšoenyeha ke mokhoa oo batsoali ba sebelisang tai ka ona, hobane o khanela moo bana ba sa hlokomele-heng. O itse leha ba lekile ho fana ka tlhabollo ka thuso ea sepolesa le bahlabolli, bothata bona bo ntse bo tsoela pele.

Mabapi le thuto e kenyeletsang bohle, Rankoe o itse leha 'muso o ntse o ntlafat-



sa Lenane-Thuto, khaello ea thuto ea puo ea matsoho likolong tsa 'muso ke tlhoko e kholo, 'me e lokela ho eloa hloko.

Leha ho le joalo, o bontšitse thabo e kholo ka hore sekolo sa habo se qalile ho amohela baithuti ba likonyana ba ka bang 30, lekhetlo la pele selemong sena. O re sena ke pontšo ea hore bana ba bangata ba ne ba sitoa ho kena likonyana ka lebaka la bofuma. O thoholelitse Lekala la Thuto, a re bana bana ba tla ea sehlopheng sa pele ba se ba tseba ho bala le ho ngola, e leng motheo oa katleho ea thuto.

E mong oa baithuti sekolong sena, Hlomphe Mo-soeunyane, o boletse hore ba thabile haholo ka ho ba teng ha likonyana, kaha bana ba bangata ba ne ba lula malapeng ba sa fumane thuto ka nako ka lebaka la khaello ea chelete.

Tichere e rutang likonyana, Refuoe Sekonyela, ea ileng a tlosoa sehlopheng

sa pele ho tlatša sekheo sa khaello ea tichere, o thoholelitse Lekala la Thuto ka ho fetola thuto ea likolo tsa Mathomo ho ela hloko hore ngoana a qale lithuto a sa le monyenyanane. O re sena se thusa ngoana ho tloaela sekolo, ho phelisana le ba bang le ho ithuta ho bala le ho ngola ka nako.

Leha ho le joalo, Sekonyela o re bofuma, tlhokomelo e fokolang ea bana le khaello ea phepo ke tsona liqholotso tse kholo. O khothalelitse batsoali ho sebelisana le litichere, ho hlokomela bohloeki ba bana le ho utloisisa hore bohloeki le phepo e nepahetseng ke lintho tsa bohlokoa kholong le katlehong ea ngoana.

Ketsahalo ena e totobalitse hore tšireletso ea bana, thuto ea boleng le tlhokomelo e nepahetseng ke motheo oa ho aha sechaba se phetseng hantle le moruo o tsitsitseng. Ho tsetela thutong ea bana kajeno ke ho sireletsa bokamoso ba naha.



Phepo e behiloe pele thutong

Nthabeleng Seithheko

Phepo e totobalitsoe e le karolo ea bohlokoa ntlafatsong ea thuto nakong ea mokete oa 'Back to School' o neng o tsoaretsoe Sekolong sa Mathomo sa Linareng, Tsikoane, Seterekeng sa Leribe, o hlophisitsoeng ke Lekala la Thuto le Koetliso (MOET) ka la 26 Pherekhong Monongoaha.

H'a bua ketsahalong eo, Morena oa Sehlooho oa Tsikoane, Peka le Kolobere, Mofumahali Pontšo Seoehla Mathealira, o bontšitse ho se khotsofale ke hore sekolo sa Linareng ha se sa na lirapa tsa meroho. O itse sena ha se hohele, haholo-holo ha hobane Motlotlehi Letsie III ke Moemeli oa Afrika tabeng ea Phepo e Nepahetseng, ka hona

so ea Lijo e le mohato o moholo oa ho matlafatsa taba ea phepo.

O boetse a hlalosa hore Motlotlehi o file marena a maholo boikarabello ba ho netefatsa hore mesebetsi ea phepo e kenngoa tšebetsong libakeng tsa bona, ka hona boteng ba hae lenaneong leo e ne e le karolo ea ho phethahatsa taelo eo.

Ha tšehetsa maikutlo ao, Motsamaisi oa Thuto Seterekeng sa Leribe (DEM), 'Mabohlokoa Masunhloane, o itse Lekala la Thuto le Koetliso le motlotlo ka Sekolo sa Mathomo sa Linareng, ka hona se lokela ho lema lijo kahare ho sebaka sa sona. O supile hore sekolo se haufi le tsela e kholo e eang Maputsoe, kahoo lirapa tsa meroho li ka etsa hore sebaka seo se phele, se be setle, se be se hohele mahlo a ba fatang tseleng.

"Sekolo se tsoanetse ho



tisetsa melokong e tlang. O khothalelitse bana ba amohetseng limpho hore ba sebetse ka thata lithutong tsa bona, ba fete litlhahlobo ka katleho, ba le bontše le boitsoaro bo botle.

H'a bua lebitsong la boto ea sekolo, 'Mama-

lema meroho. A re sekolo se na le jarete e kholo e ka amohelang lirapa tsa meroho, 'me bana ba tla ithuta sekolong ebe ba il'o sebelisa tsebo eo malapeng a bona.

H'a bua ketsahalong eo, e mong oa baithuti, Noliwe Mohapi, o bontšitse

of Lesotho (NECDOL) e ile ea fana ka lieta tsa sekolo hammoho le TJ National Management Agent tlas'a lenaneo la phepo ea sekolo. Lefapha la Meru lona le ile la aba lifate ka tšebelisano le morero oa Regeneration of Landscapes and Livelihoods



sechaba sohle se tsoanetse ho mo tšehetsa ka liketso tse bonahalang.

Mofumahali Mathealira o totobalitse hore phepo e nepahetseng ke motheo oa kholo le ntšetsopele ea ngoana, hape e ama ka kotloloho katleho ea hae thutong. A re ke nako ea hore sekolo sa Linareng se kenelle ka matla temo ea meroho, a supa tšehetso e fanoang ke Lekala la Temo, Phepo le Tširelet-

phela ka limela," ho boleitse Masunhloane.

O itse bana ba tla ja lijo tse tsoang lirapeng tsa sekolo, e leng se tla ntlafatsa boemo ba bona ba phepo le ho ba thusa ho fihlela litholoana tse ntle thutong. Mabapi le limpho tse abetsoeng bana, o itse MOET e ananela haholo limpho tseo, kaha e ruta bana bohlokoa ba ho fana le ho tšehetsana, e leng thuto eo ba tla e fe-

lia Nalane o itse mokete oo o bohlokoa hobane o khothaletsa bana le ho ba fa tšusumetso ea ho rata sekolo. O boetse a bontša a thabile, 'me a re leha sekolo se le mahaeng, se ile sa khethoa ho tšara ketsahalo ea 'Back to School'.

Nalane o ananetse haholo tlatsetso ea Lekala la Temo, Phepo le Tšireletso ea Lijo ka ho ruta bana le litichere mokhoa oa ho

teboho ho batšehetsi ho Lekala la Thuto le Koetliso ka ho tsoara mokete sekolong sa Linareng. O itse ba thabetse ho hopoloa ketsahalong ena e etsahalang selemo le selemo likolong tse fapakaneng.

Nakong eona eo, Lekala la Thuto le Koetliso le ile la aba lisebelisoa tsa bohloeki ho baithuti ba 17 ba tloksing sekolong seo. Network of Early Childhood Development

Project.

Ho latela sebaka sa marang-rang sa Machaba a Kopaneng, lipehelo tsa Ntšetsopele ea moshoelella (SDGs) tsa bobeli le tsa bone li totobatsa ho felisa tlala (Zero Hunger) le ho fihlela thuto ea boleng (Quality Education). Liketsahalo tsa letsatsi leo li bontšitse ka ho hlaka hore lipehelo tsena lia lateloa ka ho kopanya phepo le thuto molemong oa bana.

Phetoho ea boemo ba leholimo e ka nyolla moru

Nthabeleng Seithleko

Mokhatlo o shebaneng le ntlafatso ea bacha, polokeho le ntlafatso ea tikoloho, SAILERI, o re Lesotho joaloka linaha tse ling lefatšeng, le tsoanetse ho akofisa le ho amohela mekhoa e mecha ea ho etsa chelete, ka ho sebelisa menyetla e tlosoang ke phetoho ea boemo ba leholimo, ho kenyeletsa tlhahiso ea matla a sa silafatseng tikoloho le thekiso ea moea o hloekisitsoeng (carbon trading), e ka sebelisoang ho tšehetsa Litsi tsa Bophelo, tlhahiso ea mesebetsi le ntšetsopele ea moruo oa naha.

H'a bua le boralitaba ka la 26 Pherekhong monongoaha, Molula-Setulo oa SAILERI, Kananelo Manyeli, o hlalositse hore phetoho ea boemo ba leholimo ha e sa le taba ea bokamoso, empa ke boemo bo seng bo ama bophelo ba Basotho ka kotlolloho. O itse lintho tse ngata li kenya letsoho phetohong ena, tšebeliso ea libeso le lisebelisoa tsa khale tsa ho pheha, ho chesoa ha mashala, tšebeliso ea mafura a likoloi le mosi o tsoang lifemeng, tseo kaofela ha tsona li eketsang moea o silafatseng sekapakeng.

Manyeli o hateletse hore leha phetoho ea boemo ba leholimo e tliša litlamorao tse bohloko, Lesotho le ka fetola bothata bona monyetla ka ho tsetela matla a sa silafatseng tikoloho a kang matla a letsatsi, a moea le a metsi, a ka fokotsang tšilafalo le ho theha mesebetsi e mecha sebakeng sa bacha.

A re 'carbon trading' ke monyetla o moholo oo Lesotho le sa ntseng le sa o sebelise ka botlalo. O hlalositse hore naha e ka fumana chelete ka ho lema le ho sireletsa lifate, ho hlokomela matamo le libaka tsa tlhaho tse monyang khase e silafatsang (carbon sinks), e leng chelete e ka sebelisoang ho matlafatsa litšebeliso tsa bophelo, ho ntlafatsa thuto le ho tšehetsa merero ea bacha.

Motlatsi oa Molula-Setulo oa SAILERI, Keneuoe Matšaba, o ipilelitse ho

sechaba hore se fetole tsela eo se phelang ka eona, ka ho fokotsa liketso tse silafatsang tikoloho le ho amohela mekhoa e ntlafetseng ea temo e lumellanang le phetoho ea

boemo ba leholimo. O itse komello e ntseng e ata Lesotho, hoo ke bopaki ba hore lintho li fetohile, kaha le linako tsa ho lema ha li sa tšepahala joaloka mehleng.

Matšaba o re tharollo e kholo ke ho ntlafatsa lefapha la temo, ho kenyelletsa temo e nosetsoang, temo ea matloana le temo ea mahlale, e ka etsang hore lijalo li lengoe selemo ho

pota, ho sa tsotellehe hore na ke nako efe ea selemo.

O totobalitse hore leha phetoho ea boemo ba leholimo e na le litlamorao tse mpe, e boetse e bula menyetla ea moruo, haholo-holo ka temo ea litholooana, e ka etsahalang hantle libakeng tse ngata tsa Lesotho. O khothalelitse batho ba mahaeng le ba metseng hore ba kenelle temong ea lifate tsa litholooana, hobane lifate tsena li monya moea o silafatsang, li ntlafatsa tikoloho 'me li hlalisa chelete.

Ho ea ka SAILERI, Lesotho le qalile ho utloa bohloko ba phetoho ea boemo ba leholimo ka komello e matla, likhohola, ho fokotseha ha tlhahiso ea temo, ho senyeha ha mobu le ho omella ha matamo, e leng se amang ka kotlolloho phepele ea lijo, mesebetsi ea balemi le moruo oa naha. Boemo bona bo ama haholo bacha, kaha bofuma le ho hloka mesebetsi li ba pepeneneng.

Ka hona, Matšaba o ipilelitse haholo ho bacha hore e be bona ba ka pele ntlafatsong ea tikoloho, ka ho lema lifate, ho sireletsa matamo, ho qoba ho senya tikoloho le ho nka karolo mererong e mecha ea 'green economy'. O itse bacha ba tsoanela ho fuoa litsebo le likoetliso hore ba bone tikoloho e le mohololi oa mesebetsi le boqapi, eseng moroalo.

SAILERI e phethela ka hore phetoho ea boemo ba leholimo ke bothata ba bohle, empa hape ke monyetla oa ho aha moruo o tsoarellang, ho sireletsa tikoloho le ho theha bokamoso bo botle bakeng sa meloko e tlang.

Mokhatlo o re haeba Lesotho le ka tsetela ka bohlele mefuteng ena e mecha ea moruo o motala, naha e ka fokotsa bofuma, ea bopa mesebetsi le ho ba mohlala oa ntšetsopele e lumellanang le tikoloho.

Ho sireletsa mobu ke ho sireletsa Bana



Nthabeleng Seithleko

Lefapha la Tsamaiso ea Mobu (LAA) le Lesotho Housing and Land Development Corporation (LHLDC) li boetse li hateletse ka matla hore ho ba le lengolo la taolo ea mobu (lease) e ngolisitsoeng ka molao ha se tšireletso ea mobu feela, empa ke motheo oa tšireletso ea bana, botsitso ba malapa le ntšetsopele ea moruo oa naha ka bophara. Litaba tsena li hlalelletse ketekelong ea 'Back to School', Teyateyaneng, ka la 26 Pherekhong Monongoaha.

Mookameli e Moholo oa LAA, 'Malichaba Lekhoaba, o hlalositse hore 'lease' e sebetse e le lengolo la molao le netefatsang beng ba mobu. O totobalitse hore bana ke bona ba amehang haholo ha mobu o sa sireletsoa ka molao, kaha likhang tsa mobu hangata li lebisa ho qhalaneng ha malapa, ho lahlehela ke matlo le ho sitisoa ha thuto ea bana. A re ngoana ea phelang ka tšabo ea ho lelekoa kapa ea se nang bolulo bo tsitsiseng o sitoa ho ithuta hantle, e leng se amang bokamoso ba hae le ba naha.

Lekhoaba o boetse a hlakisa hore 'lease' e bohlokoa moruong, kaha e ka sebelisoa e le tiisetso ha ho kopuo likalimo libankeng le mekhatlong ea lichelete. Sena se fa beng

ba mobu menyetla ea ho tsetela matlong, likhoebong tse nyenyane, temo e ntlafalitsoeng le merero e meng ea ntšetsopele e bopang mesebetsi ho matlafatsa moruo oa naha.

A bua ka taba ea mobu oa temo, o ile a lemosa Basotho hore ho aha mobung oa temo ho beha tšireletso ea lijo kotsing, ho fokotsa tlhahiso ea lijo le ho eketisa bofuma. O itse naha e ke ke ea fihlela ntšetsopele ea moruo ha mobu oa temo o senyeha, kaha temo ke motheo oa bophelo ba batho ba bangata, haholo mahaeng.

Ha tšehetsa maikutlo ao, Motsamaisi e Moholo oa LHLDC, 'Malesekele Matekane, o itse 'li-lease' li bapala karolo e kholo tšireletsong ea bana kamor'a lefu la batsoali. O hlalositse hore ha ho se na litokomane tsa molao, bana hangata ba qetella ba hlekefetsoa ke beng ka bona kapa ba amohua matlo, ba qobelloa ho lula mebileng kapa ho tlhela sekolo.

O itse litokomane tse hlakileng li netefatsa hore bana ba sala ba e-na le bolulo, ba sirelelitsoe ka molao, ba bile ba tsoelepele ka lithuto le bophelo bo tloaelehileng ntle le likhohlano. Sena, ho ea ka eena, ke mohato oa bohlokoa o ahang sechaba se sireletsehileng le se hlompang litokelo tsa bana.

Ho tlalehoa hore Lesotho e tobane le keketseho ea

likhang tsa mobu, khaho e seng molaong le meaho e ahiloeng mobung oa temo, ka lebaka la hore libaka tse ngata ha lia ngolisoa ebile ha li na 'li-lease'. Boemo bona bo senya moruo le ho baka mathata a sechaba a kang bofuma, litlole tsaa molao le ho tlhokahalo ea botsitso malapeng.

Ka hona, LAA le LHLDC li khothaletsa Basotho ho ngolisa libaka tsa bona ka molao, ho latela melao ea kabo ea mobu le ho sebetse le mekhatlo e amehang. Ba re sena se tla thusa ho fokotsa likhang, ho hohela batseteli, ho bopa mesebetsi le ho netefatsa hore ntšetsopele ea matlo le ea moruo e etsahala ka tsela e hlophisitsoeng le e tsoarellang.

Ba phethela ka hore 'li-lease' ha se lipampiri feela, empa ke lisebelisoa tsa tšireletso ea bana, botsitso ba malapa, tšireletso ea lijo le motheo oa ntšetsopele ea moruo oa Lesotho. Ho sireletsa mobu kajeno ke ho sireletsa bana le bokamoso ba naha kamoso.

KHOELEHETSO HO BACHA

Re kopa bacha bohle ba khoebong, tse ntseng li thuthuha le tse seng li

iphumane ba bue le

Moeletsi oa Basotho ho:

newsroom@moeletsiabasotho.co.ls kapa nomorong ea

WhatsApp ea +266 62600983 ho arolelana le bacha bang ba nang le khahleho ea ho qala

khoebo, empa ba sa tsebe ba ka qala joang.

TSEBA LIBAKA

Morocco ena ke eng? E hokae?

Ke naha e hloahloeng e leboea ho Afrika. Hona joale ene tsoere litholisano tsa bolo linaheng tsa Africa (AFCON). Karolo ea boraro ea eona e na le lithaba tse ntle tse bitsoang Atlas ho ea ka leboea ho eona, ha ka boroa ho e-na le lehoatata. Empa e ntse e-na le lithota le liphula tse ntle moo ho ka lenngoang teng. Baahi ba eona bohoto ke Masolomane a Ma-arab, hape ho na le ba bitsoang Ma-Berber eleng bona baahi ba pele ba teng, ka bongata bo ka etsang 30 lekholong le ba bang ba mefuta ba akhang le Makhooa.

E haufi haholo le Europe (Spain), bohoto ba likilomethara tse leshome (10km) feela. Li arotsoe ke leotlatle la Atlantic.

Tse ling ka bokhutsoanyane;
Bohoto ba eona;
275,177 sq miles, (ho kenyeletsa Western Sahara).

Palo ea baahi;
28,000,00, ka 45% ba tsebang ho bala le ho ngola.

Motse moholo;
Rabat, (ka batho ba 1,220,000)

Litoropo tse kholo;
Casablanca, Fez, Marrakech, Tangier le Diabat

Moruo;
Merafo (phosphate le lihlahisoa tse ling), leruo la lithlapi, lifeme tsa liphahlo, le temo ea litholoana le meroho. Bohahlauli le bona ke ntho e kholo. Chelete ea teng ke Dirhams, e haufi le Maloti a mabeli.

Batho ba Morocco ba itumela haholo ka histori ea naha ea bona e kileng ea pharalla ho tloha Spain ho ea kena Libya, ba itumela ka hore ba ile ba fana ka botšabeli ho likete-ke tsa Majuta a neng a lelekiloe Spain lilemong tsa bo 1490. Hape ka marena a bona, joaloka Juba II ea ileng a nyala morali oa Marc Antony le Cleopatra, le ka hore Morocco e bile e 'ngoe ea linaha tsa pele tsa ho ananela boipuso ba naha ea United

States ha e fihla. Naha ena e fumaneng boipuso ka 1956 e ntse ena le liqholotso tse kang; khaello ea mesebetsi hoo baahi ba bangata ba tlamehang ho batla mesebetsi linaheng tse ling. Meputso eo ba e romellang hae ke o mong oa mehloli ea chelete naheng eo. Hape batho ba tloha metseng ho ea leka lehlohonolo litoropong ka bongata. Ntho e 'ngoe eo u tla e elelloa 'mali ke lekhalo le lehoto, phapano ea leruo lipakeng tsa barui (litoropong) le mafutsana (metseng)

Puso
Morocco ke naha e busoang ka borena, molao oa eona oa motheo, o etsang hore ho be le mekha e mengata le paramente, o fa Morena kapa Motlotlehi oa teng matla a feletseng a puso.

E meng ea mekhoha ea teng ke e makatsang tjena; batho ba teng ekare ha ba tsotelle lintho ha u ba shebile, ha ba na le ntho e mona eo ho thoeng nako ke chelete, ntho ea bohlokoa. Mohlala, ha u ka lumellana le motho hore le kopane ka hora ea pele, uena u iphihlele ka hora ea bobeli ebe u mo emela ho fihlela hora ea boraro. Ha hora ea bone eka otlala a ntse a so fihle u eme ho fihlela hora ea bohlahano ebe u'a tsamaea. Ba e bitsa nako ea Morocco. Le mosebetsi ha o ka lieha ho etsoa ka nako ea khoeli ke saa! Batho bane ba neng ba bitsoa 'mahipi' ba ile ba e rata naha ena.

Jimi Hendrix sebini se tumileng sa Amerika o ile a lula lilemo tse hlano kaofela toropong ea Diabat e lebopong la Atlantic Ocean. A ba a qapa pina e bitsoang "Castles in the sand" ha a ntse a bona lithako tsa e 'ngoe phaleisi ea mono. Setaki sa Le-fora Henri Matisse eena o re nako eo a e lutseng Morocco e fetotse bophelo ba hae. Mark Twain eena ha a ngola ka 'maraka oa toropo ea Tangier a re; "Ke pono e ntle e khathollang e monko o

monate." Leha ho shebahala eka ho monate hakaalo moo 'nete ke hore bophelo ba teng ke ho hoehla, ho se nyahame le ho ba le tšepo.

Tsa bophelo
Bohahlauli ke khoebo ea boraro e kholo kamorao ho temo le merafo. Lihoai tsa moo li hlalisa ntho tse ngata, koro, meroho lipalesa le litholoana tse bileng li romeloang linaheng tsa Europe, Canada le USA. Merafo ke ea 'phosphate' e ngata, le lihlahisoa tse ling. Bohahlauli bo kenya chelete e baloang ka li-billione tsa li-dollar ka selemo. Ho eteloa mahoa-tateng ka likamele, ho ea thelelisoa lithabeng tsa teng le ho cheha lithlapi le ho tsoma linonyana. Khoebo e 'ngoe ke ho aha matlo a ho hlapa le ho sesa ka metsi a tsoang lilibeng tsa fatše. Hobane bo bong bothata ba metseng ea moo ke tlhoka-

halo ea metsi le motlakase. Libanka li ngata litoropong tse kholo tse kang Casablanca empa ha li eo ka metseng, ha ho moo batho ba koallang chelete. Ba lula le eona ka matlung

Ka lebaka la moruo o seng motle, bobolu bo tofile. Lebopong le ka leboea le shebaneng le Europe ho atile li-'maraka tsa thepa e utsoitsoeng hona teng; li-TV, likoloi le tse ling. Lithe-thefatsi (kef, marijuana) li etsoa ntho e bitsoang 'hashish' ebe li romeloa Europe. Tsona li kenya li-billione tse peli tsa li-dollar ka selemo. Joale tjo! Ua utloa ausi e mong ea mae-mong a holimo mosebetsing a re; "lepolesa le u fa tekete, ha u le sheba u bona hore le na le mosali le bana ba bane, u ipotsa hore na motho eo ka moputso oa hae oa li-dirham tse kete tse peli ka khoeli o phelisa lelapa la hae joang? E se

eka setlamo hore ha le u fa tekete ea 100 dir, uena u le nehe 50 dir. Hore le se ke la u ngolla tekete. Le 'muso oa tseba feela o iphapanitse hobane ha o khone ho nyolla meputso ea bona. Ho thoe ke mohau.

Morocco e labalabela likamano tse tebileng le Europe. Ehlile e shebile bophirimela, ha u bone ha e ile ea kopa ho ba setho sa EU ka 1984 ea mpa ea hloloa ea latoleloa. Leha ho le joalo, baahi ba teng ba ntse ba tšelela Europe ka bongata ho ea sebetsoa.

Litšoang-tšoang ka Mexico le Amerika (USA). Eona ka bo eona ke motsoako oa bofuma (basali ba lithabeng ba Ma-Berber) le borui (banana ba palamang lithuthuthu ba kenang likolong tsa li-unifesiithi). E joalo, leha re sa e qeta ka ha taba tsa eona, li ngata.

Neo Bohloa



Our Shirts

Timeless Designs. Tailored Confidence.

Wear your power

Place your order

Mazenod Tailoring
Progress good Progress for The Land

TEL: +266 28 350 814
WhatsApp: +266 50757585
Email: tailoring@mazenodprinting.co.ls
Facebook as Mazenod Tailoring

PHYSICAL ADDRESS:
MAZENOD, HA PAKI
OPPOSITE POST OFFICE



Lesotho e ba mohokahanyi oa APPN

Nthabeleng Seithleko

Mohokahanyi ea sa tsoa khethoa oa baphatlalatsi le batlalehi ba litaba tsa Paramente tikolohong e ka Boroa ho Afrika (APPN), Thoboloko Ntšonyane, o re ha ho pelaelo hore bophatlalatsi bo pharaletseng, bo nepahetseng le bo ikarabellang ka litaba tsa Paramente bo ka tlisetsa naha ea Lesotho le Basotho kholo le ntšetsopele e bonahalang, o boletse tsena, pusanong le Koranta ka la 27 Pherekhong monongoaha.

Ntšonyane o hlalositse hore ha Basotho ba lula ba e-na le leseli ka mesebetsi, liqeto le melao e fetisoang paramenteng, ba ba le matla a ho etsa liqeto tse nepahetseng le tse ntlafatsang bophelo ba bona. A re Paramente ke setsi sa liqeto tse amang sechaba ka kotloloho, ka hona ho bohlokoa hore litaba tsa eona li fihle ho batho ka

botlalo le ka nako.

O itse morero o moholo oa boemo boo a bo filoeng ke ho aha likamano tse matla tse phetseng hantle lipakeng tsa Paramente le baphatlalatsi ba litaba paramenteng, e le hore tlhahiso-leseling e phalle ka bolokolohi, ka botšephehi le ka boikarabello.

A re ke tlotla e kholo hore naha ea Lesotho e khethetsoe ho ba mohokahanyi tikolohong ena, kaha sena se bula sethala sa machaba sa ho phahamisa setšoantšo sa Lesotho le ho ntlafatsa mokhoa oo litaba tsa naha li tlahehang ka oona kahare ho tikoloho ea SADC le ho feta moo.

Leha ho le joalo, Ntšonyane o itse le hoja bophatlalatsi ba litaba tsa Paramente bo ntse bo hola tikolohong e ka Boroa ho Afrika, ho ntse ho hloka-hala boiteko bo boholo ba thuto le koetliso ho baphatlalatsi, kaha liqeto tse fihleloang paramenteng li ama bophelo ba sechaba ka kotloloho. O hatelletse hore bo-ralitaba ba lokela

ho utloisisa hantle tšebetso ea Paramente hore ba tle ba tlahe ka botebo, ka toka le ka nepo.

O boetse a hlalosa hore e 'ngoe ea mesebetsi ea mantlha ea bona ke ho netefatsa hore leseli lena le fihla linaheng tsohle tsa tikoloho, le hore baphatlalatsi le batlalehi ba litaba tsa Paramente ba matlafatsoe hore ba tsebe ho tlaheha ka botlalo litaba tsa liparamente tsa linaha tsa bona hammoho le tsa machaba, haholo-holo tsa Pan African Parliament.

A re ho khethoa ha bona boemong bona ke sesupo sa kholo le bokhoni, 'me ho ba beha boemong bo botle machabeng, ho bula menyetla ea tšebeliso, koetliso le phapanyetsano ea boiphihlelo.

H'a fana ka maikutlo a hae, Kananelo Boeloetse oa MISA Lesotho, o re khetho ea Lesotho boemong bona ke pontšo e hlakileng ea hore bo-ralitaba ba Lesotho ba na le bokhoni bo ananeloang machabeng. O itse sena se

bontša hore menyetla ea bo-ralitaba ha e felle Lesotho feela, empa e atolohela le maemong a machaba, 'me a leboha haholo boitlamo ba baphatlalatsi ba litaba tsa Paramente.

Boeloetse o khothalelitse baphatlalatsi hore selemong sena se secha ba sebetse litaba tsa sechaba ka 'nete eohle, ba se ke ba khetha batho kapa mahlakore, empa ba itšetlehe ka melao-motheo ea boitšoaro ba bo-ralitaba. O itse ba bonoa kapa ba sa bonoe, ba lokela ho etsa mesebetsi oa bona ka botšephehi, kaha mesebetsi oo o thusa Basotho ho etsa liqeto tse nepahetseng.

O ile a boela a totobatsa hore le hoja baphatlalatsi ba bangata ba tobana le meputso e tlaase le mathata a mesebetsi, ho na le mahlohonolo le tlhohonolo-fatso e tlišoang ke ho etsa mesebetsi ka nepo. A re ba se ke ba nyahama kapa ba kheloha tseleng ea boitšoaro, empa ba lule ba tiile mesebetsing oa bona.

Baphatlalatsi ba bang ba

amohetse khetho ena ka thabo, ba re e bontša hore Lesotho le ntse le hola le ho hlahella litabeng tsa bophatlalatsi machabeng. Ba re Ntšonyane ke motho ea sebetsang ka thata ho bona hore boemo ba bophatlalatsi ba naha bo ea ntlafala.

E mong oa bona, Tšepiso Serabele oa 'Weekly Observer', o itse o motlotlo haholo ka khetho ena, a re e bontša hore bo-ralitaba ba Lesotho ba se ba bona menyetla ea bophelo le ea mesebetsi kantle ho naha. O itse sena ke kholo e bontšang boiphihlelo le bokhoni ba baphatlalatsi ba litaba tsa Paramente.

Ho ea ka tlaheho, Thoboloko Ntšonyane o tla sebetsa ho hokahanya bophatlalatsi ba litaba tsa Paramente linaheng tse kenyeletsang Angola, Es-watini, Lesotho, hammoho le linaha tsohle tseo e leng litho tsa Pan African Parliament, e leng mohato o moholo bakeng sa bo-ralitaba ba Lesotho le setšoantšo sa naha ka kakaretso.



TSA KEREKE

O ba abela Sakramente ea Tiiso

Tšeliso Thakholi

Moarekabisho-po oa Tikolo-ho e Kholo ea Maseru, Mobabatsehi Tlali Gerard Lerotholi OMI o abetse bana ba 213 ba Parish ea Maria Mofumahali oa Lefaatše, Mazenod, Sakramente ea Tiiso litšebelatsong tsa Sehlabelo se Halalelang sa

la Moea o Halalelang."

A re kajeno e hlile re bit-sa Pentekonta ho theolela Moea o Halalelang. A re Kereke ena eo re leng litho tsa eona ha re lokele ho ut-loahala feela re ntse re re "Jesu ke morena Alelluea empa re re Ntate, Mora le Moea o Halalelang." A tiisa hore litšebelatsong tsa Kere-ke le bophelo ba eona ha li pheliso ke rona feela, empa li tsamaisoa ke Moea

chakela ba lichankaneng.

H'a ba botsa hore na ke ba bakae batiiseletsua ba ikemiselitseng ho phetha mesebetsi ena ea mohau, kaofela ha bona ba ile ba phahamisa matsoho, 'me ba re ba ikemiselitse ho e phetha ho kenyeletsa le ho fa ba nyoriloeng metsi le ho apesa ba hlobotseng.

Kamor'a ho pasa ka makhetha a maholo lipot-so tsena tseo Mobabatse-



'Missa ka Moqebelo oa la 24 Pherekhong 2026.

H'a fana ka khotatso Mobabatsehi o boleletse phutheho ea bakriste ba Ma-ria Mofumahali oa Lefaatše hore moea o bohlokoa, 'me ka mehla ha re qala thape-lo ea rona re re:"Ka lebitso la Ntate, Mora le la Moea o Halalelang. A re joalokaha Moea o Halalelang o ile oa theohela holima baapostola ka sebopeho sa maleme a tukang o ke o thehele holi-ma rona bohle.

A re joaloka moea ona o fokang oo re sa o boneng moo o tsoang, hao le sieo re ke ke ra phela. "Ha o amoha libupua tsa hao moea ona lia shoa. Le rona ha o re amoha moea oa hao morena re ea timela." o bo-letse joalo a bile a re: "Tloho Moea o Halalelang o tlatse lipelo tsa balumeli ba hao, hotetsa mollo oa lerato lena

o Halalelang.

Kamor'a khotatso ena e matla Mobabatshi o ile a botsa bana ba tiiseletsoang hore na ba kopa eng Ker-ekeng ea Morena Molimo, 'me bona ba mo araba ka hore ba kopa Sakramente ea Tiiso. Ba re Sakramente ea Tiiso ke Sakramente e re nehang Moea o Ha-lalelang le bongata ba lineo tsa ona hore re be bakriste ba phethehileng, lipaki le baapostola ba morena oa rona Jesu Kriste.

A boela a ba botsa hore na lineho tsa Moea o Ha-lalelang li kae ka palo, ba itse li supile ke neho ea Bohlale, Kutloisiso, Morero, Matla, Tsebo, Borapeli le tšabo ea Molimo. Batiise-letsua ba boetse ba ara-bela Mobabatsehi ka hore mesebetsi ea mohau ke ho fepa ba lapileng, ho hloela bakuli, amohela baeti le ho

hi a ileng a ba botsa sona, eena 'moho le Fr. Patrick Khoaele OMI ba ile ba baTšoa oa phatleng ka Olie ea Karisima e le haba amo-hela Sakramente ea Tiiso, e le leTšoa o la Moea o Ha-lalelang leo ka lona ba tlang ho tseba ho bolela tumelo ea bona pontšeng, ho phela le ho shoa ho ena le ho e latola.

Ha Sehlabelo sa 'Missa se fihla pheletsong, Fr. Pat-rick Khoaele, Molula-Setulo oa Lekhotlana le moemeli oa barupeli ba ile ba leboha Mobabatsehi ka mosebetsi o bokhabane oo a o entseng oa ho tla abela bana Sakra-mente ea Tiiso. Ba leboha le batsoali ba bana 'me ba ip-iletsa ho bona ho tsoelapele ka boikarabello ba bona ba ho alosa kholiso ea bana ba qetang ho tiiseletsoa le ho bona hore ba kena kereke hantle.

2025-2026 SELEMO A

SONTAHA SA 4 HAR'A SELEMO



Sofonia 2:3;3,12-13

Pesalema 145

1Bakorinthe 1:26-31

Matheus 5:1-12

Khotatso



Maahlohonolo

Ka nako e 'ngoe, re fumana evangelizing litemana tse re makatsang ruri, tseo ho leng thata ho li utloisisa, tseo re li amohelang ka thata. Empa re lokela ho li amo-hela hobane li tsoa ho Molimo, Mopholosi oa rona, Leseli la rona, 'Nete ea rona, Bophelo ba rona le Tsela ea rona e re isang leholimong. Ho feta moo, ha re teana le linnete tsa mofuta ona, re tsebe hore ke tsa bohlokoa thutong ea Kriste, ke moko oa evangeli ea hae. Ha re fumana ho le thata ho amohela thuto ea hae, ke hobane re ba lefatše, re na la moea oa lefatše, 'me ha re e-s'o sokolohe ka ho tla.

Evangeli eo re e utloileng kajeno, e bitsoang ea "Mahlohonolo", ke e 'ngoe ea lithuto tsena tse thata tsa Jesu. A ka bolela joang hore ba fumanehileng, ba mahlomoleng, ba lapileng le ba hlirisoa ba lehlohonolo? A ka bolela joang hore re lehlohonolo ha re hlapaola, re hlirisoa 'me re etseletsoa?

Taba ea pele, Kriste h'a bolele hore ba fumanehileng, ba mahlomoleng le batho ba joalo, ba lehlohonolo hona joale litsietsing tsa bona, empa ba lehlohonolo ho-bane ba tla tšelisoa, ba tla hauheloa le ho khotsofatsoa ka moso.

Jesu o tseba joaloka rona hore ho bohlokoa haholo ho lapa, ho hlirisoa, le ho ba mahlomoleng a mofuta ofe kapa ofe. Ebile mahloko ana o a utloile joaloka rona le ho feta rona motseng oa Nazareth, litseleng tsa Palestina le Jerusalem. Empa, ka mantsoe ana, Kriste o tiisa ka matla hore bophelo bo sa feleng bo feta hole bophelo bo felang ba lefatše lena kapa ra nyahamisoa pelo ke mahloko a motsotsoana.

Taba ea bobeli, ka ho re bolela linnete tsena tse boima tsa thuto ea hae, Kriste o rata hore re inahane holim'a le leng le le leng la mahlohonolo ana. Batho ba na bao a reng ba tla ba lehlohonolo ke bo-mang? Ke ba bonolo, ba tsebang ho iphanyetsa mathata, ke ba tlatlapoang ka ho hlokeloa toka ke ba bang empa ba se na lehloeo pelong tsa bona 'me ba tseba ho tsoarela.

Ka mokhoa o tsoanang, ba tla ba malimabe, ke ba hlirisang ba bang, ba ba hat-ellang, ba se nang mohau leha e le kutloelo-bohloko, ba busang ka lere la tšepe, ba ratang ho iphetetsa 'me ba sa tsebe ho tsoarela.

Mahlohonolo a re senolela pelo ea Molimo, a re botša kamoo moea oa lefatše o leng hole le moea oa Molimo kateng. Rea utloisisa joale hore mehlopo ea Molimo ha se mehopoloe ea batho. 'Me le teng, re utloisisa hore, ha re rata ho kena 'Mu-song oa Molimo, oo re o baletsoeng le ho rua mahlohonolo a oona, re tsoanetse ho furalla mahlohonolo a thetsang a lefatše le menate ea lona e fetang. Ke eona thuto e thata eo re e tšabang, eo re sitoang ho e utloisisa, empa eo re tsoanetseng ho e lumela.

Ho thata haholo ho lumela mantsoe ana, le ho kholoa hore ho molemo ho itela le ho itima menate eo re ka bang le eona habonolo hajoale, hore kamoso, re tle re fumane lehlohonolo le fetang la lefatše lena 'musong oo re sa o tsebang. Empa Jesu ke mosuoe ea ratang pelo ea motho le hona pelo e nang le kutloisiso. Jesu o re bontšitse ka mehla ea hae hore thuto ene ea hae ke ea 'nete, hobane ke eona tsela eo eena ka sebele a ikhethetseng ho tsamaea ka eona, ha a nts'a phela har'a rona.

O ile a tsoaloe e le mafutsana, empa e le Mora oa Molimo ea matla o'hle, 'me bofutsana ba hae re bo hlalositsoa maqephehang a evangeli ho tloha Bethlehemema ho ea Kalvaring.

O ile a phela e le motho ea bonolo, ea mosa, ea mohau, ea nang le kutloe-lo-bohloko ho mosali oa moetsalibe, ho molepera le ho mohlolohali oa Naime.

O n'a lapetse 'me a nyoretsoe toka, 'me o ile a supa ka monoana barui, babusi le bohle ba hlokanang toka le mohau. O ile a hlirisetsoa ho loka, a ba a ho bolaeloa, a sa rate ho furalla Morena Molimo Ntata'e, le ho thabisa lefatše ka ho ananela mesebetsi e fosahetseng ea lona.

Ka tsoho ea hae bafung le ka nyolohelo ea hae e khanyang leholimong, Jesu o re bontšitse hore ehile 'muso oa hae o na le matla a ho hlola lefatše, hobane ke 'muso oa leseli, oa thabo, oa mohau, oa lerato le oa khotso.

Seo Jesu a se batlang ke hore re mo tšepe 'me re lumele hore seo a re ballang sona, o tla se phethahatsa. A re lekeng he, ho phela ka lehlohonolo la 'nete le sa feleng la leholimo.

Bahalaleli har'a Beke

2	Hlakola	Feock
3	Hlakola	Blaise
4	Hlakola	Modan
5	Hlakola	Avitus
6	Hlakola	Mel
7	Hlakola	Pius IX

Likuena e itokisetsa AFCON

Tšeliso Thakholi

Nakong ena eo botsamaisi ba Sehlopha sa Naha sa Likuena se tsoileng letšolo ho tsoma mokoetlisi e mocha, Motsamaisi oa Bakoetlisi Monghali Caswell Moru o phatlalalitse mabitso a libapali tse 22 tse tlang ho kena kampong ho itokisetsa lipapali tsa ho phunyeletsa ho ea Mohopeng oa AFCON o tlang ho bapalloa linaheng tsa Uganda, Tanzania le Kenya ka 2027.

Likuena e kena kampong tjena e ntse e batla mokoetlisi e mocha kamor'a hore Mokoetlisi Leslie Notši nako ea hae e fihle pheletsong ngoahola. Notši o ne a kene lieteng tsa Veselin Jelusic ka Phupjane 2023, 'me a bapala lipapali tse 38 tsa machaba a hapa tse 8, a bapala ka ho lekana ho tse 8 le ho hloloa ho tse 22.

Papali ea pele eo Likuena e tlang ho e bapala ke ea Seychelles moo e tlang ho e lata letailane, 'me lena e tla be e se lekhetlo la pele e bapala le Seychelles, nakong ea Mokoetlisi oa mehleng, Veselin Jelusic Likuena e ne e e hlole. Lipapali tsena tsa mathomo tsa ho ea lipapaling tsa AFCON 2027 li tli'o qala ka la 25 ho isa la 31 Tihakubele 2026.

Moru o beile sehlopha sa hae tjena: Lithibathibane ke Leluma Mofofa (Matlama), Tankiso Chaba (LCS), Monaheng Ramalefane (Lijabatho), Moleng o kamorao ke Tšoanelo Koetle (Lioli), Mohlomi Makhetha (Lijabatho), Tlotliso Mapola (Majantja), Rethabile Mokokoane (Matlama), Fusi Matlabe (Lioli) le Mofokeng Lebusetsa (Linare).

Ba bapalang bohareng ke Lehlohonolo Matsau (LDF), Thabo Lesaoana (Bantu), Kananelo Rapuleng (Bantu), Tlotliso Phatsisi (Lijabatho), Tšepang Sefali (Linare) le Limphe Ralesupi (Majantja). Haele ba bapalang kapele ke Tšeliso Botsane (Bantu), Katleho Makateng (LDF) le Jane Thabantšo (Lijabatho).

Lena ke lekhetlo la pele Caswell Moru a etella sehlopha sa naha pele ho itokisetsa lipapali tsa AFCON. Ngoahola sehlopha se ile sa hloloa mokhahlelong oa lipapali tsa seka-makhao-lakhang a ho kenela lipapali tsa COSAFA, AFCON le tsa Mohope oa Lefatše. Naha

ea Lesotho ha e-s'o fihlele mokhahlelong oa makhao-lakhang oa lipapali tsa AFCON.

Ke linaha tse 10 tse tlang ho qala mokhahlelong oa mathomo oa ho phunyeletsa ho ea ho AFCON, e leng moo Djibouti e tlang ho bapala le South Sudan, Chad e bapale le Burundi, Somalia e isane holimo le tlaase le Mauritius. Athe Eritrea e tla botsana lipotso le Eswatini ha Sao Tome e tla hora-horana le Ethiopia.



Mabala ama kholo ea papali

Tšeliso Thakholi

Mokoetlisi oa Sehlopha sa Bolo ea Basali sa Berea Ladies, Monghali Lehloenyha Nkhasi o re bothata bo aparetseng naha ba tlhokahalo ea mabala a maemo a nepahetseng bo khina kholo ea lipapali. O buile tsena pusanong le motlalehi oa Koranta ena kamor'a hore sehlopha sa hae sa Berea Ladies se bapale ka seahlo-lo sa 1-1 le bo-'mampoli ba sireletsang Mohope oa Liki ba Kick4Life Women, moo ho bonahetseng lebala le ne le hilele le sitisa lihlopha ho bapala bolo e tsoileng matsoho.

Papaling ena e neng e bapalloa Lebaleng la Motebo oa Sesole, Makoanyane ka la 25 Pherekong monongoaha, Nkhasi o boletse hore a mang a mabala ao lihlopha tse kholo tsa Women Super League li bapallang ho ona, h'a maemong a matle ho hang 'me sena se amme kholo ea Liki e Kholo ea Basali. A re le ha bona e le bakoetlisi taba ea mabala e ka holimo ho matla a bona hobane lihlopha likolla ntsi hanong.

"Taba ena ea hoba le mabala a maemong a matle e taolong le tsamaisong

ea beng ba rona ba ikarabellang lipapaling tsa Liki e Kholo, ho bona hore lihlopha tsa rona tsa bolo ea basali li ba le mabala a matle kapa ho bapalla mabaleng a maemo a machaba. Sena se ka thusa ho holisa le ho matlafatsa papali ena ea banana." O boletse joalo a bile a eket-sa ka hore ba khathatsehile haholo bona e le bakoetlisi ba Liki ea Basali ho bone ka mehla libapali tsa bona li hlaha likotsi le ho robeha ka lebaka la mabala a seng matle.

A re bona e le lihlopha ha hona letho leo ba ka le et-

sang le lekalo-kalo hobane le lihlopha ka bo tsona li ntse li sena mabala a maemo a holimo. A re taba ena ea tlhokahalo ea mabala e hile e etsa hore papali ea basali e sitoe ho hola, ebe e ntse e kikitela joaloka hona joale. "Ho tloha lihlopha tse nyenyane ho ea fihla ho tse-na tse kholo tlhokahalo ea mabala ke kobo anela. Boemo bona bo re sitisa ho aha lihlopha tsa rona ka moo re batlang hore li be ka teng, 'me li kena lihlopheng tsa naha li ntse li se maemong a matle ka lebaka la mabala ao ba bapallang ho ona." Ke eena eo.

A tiisa hore tlhokahalo ea mabala e ntse e tli'o thatafatsa boiphihlelo papaling ea bolo ea basali. A ipiletsa ho ba ikarabellang lipapaling ho fana ka monyetla ho lihlopha tse kholo tsa Women Super League ho sebelisa mabala a kang ao lihlopha tsa Premier League li'a sebelisang a kang la Leribe, Mohale's Hoek le Bambatha. A qetella ka hore haele mona ba qetela mokhahlelo oa bona oa pele oa lipapali tsa liki, ba lokela ho sebetsa ka thata ho hapa lipapali tsohle tse setseng, "me ntho e 'ngoe le e 'ngoe e tla iketsa." Ke eena eo



Members e tjametsoe ke selepe



Tšeliso Thakholi

Sehlopha se sa tsoa kena Liking e Kholo ea bolo ea maoto sa Members, se bonahala se hula ka boima nakong ena e mahlonoko eo liki e keneng mokhahlelong oa ho qetela, se ileng sa sasaroa ke Bantu ka thupa e bohloko ea 1-0 ka lebaleng la Setsi sa Tlhabollo ea Batšoarua (LCS), Maseru, ka Sontaha

sa la 25 Pherekhong 2026.

Ha e ne e ka hapa papali eo, Members e ne e nyolohela boemong ba leshome ka lipapali tse 17, ea lahlehela ke tse 11, ea hapa papali e le 'ngoe, ea hlaba lintlha tse robong ha eona e hlabiloe tse 21 e na le lintlha-kholo tse 7. Kamor'a papali ena ea eona le Bantu, Members e se e lokela ho hapa lipapali tse hlano e le hore e tle e qetelle e tlohile sebakeng se kotsi eo se leng ho eona.

Pele se bapala le Ban-

tu ka Sontaha, ka Moqebelo oa la 10 Pherekong monongoaha, sehlopha sena sa Machekoaneng tikolohong ea Mazenod se ile sa makatsa batho ba bangata ha se ne se bapala ka seahlolo sa 1-1 le sa Matlama. Members e kene papaling ena mokoetlisi oa sona Monghali Daniel Ntlaloe le motlatsi oa hae Mahlomola Moea ba se ba itokotse ka mabaka a fapakaneng.

Nakong ena eo ho ntseng ho batloa bakoetlisi se ntse se koetlisoa ke Monghali

Thabang Tšehla ha nakoana, 'me ea boletseng ka sebetse sohle kamor'a papali ea hae ea bobeli le Bantu hore ba tlii'o loana ka matla a maholo hore ba se ke be ba rathoa ke selepe ha lipapali tsa liki li fihla pheletsong. "Hona joale re sa ntse re ena le tšepo e kholo ea hore ha hona moo re eang, 'me re tla loana ho fihlela papali ea ho qetela." A rialo.

A re ba qalile leoto la bobeli la liki ka tsela e ba fang tšepo ka ho bapala le sehlopha se sehlo joaloka Matlama ka 1-1, 'me ba boetse ba hloloa feela ka 1-0 ke sehlopha se sehlo sa Bantu se bileng se nang le libapali tse nang le boiphihlelo papaling ea bolo. "Haeba re eme ka Bantu e re hlotse 1-0 ke nka e le ntlafalo e kholo, 'me sena se re re tsamaee re eo itokisa mona le mane re tsebe ho tla baleha mona moo re leng hona teng." O bolelise joalo.

A phethela ka hore ho itokolla ha mokoetlisi le motlatsi oa hae maemong ana a hlobaetsang ao sehlopha se leng kahare ho ona, e bile tahlehelo e kholo empa ke maemo ao ba se nang taolo ho ona, ao ba sa tsebang le se a bakileng. Ka hona a ipiletsa ho batsamaisi ba

sehlopha ho koala likheo tseo kapele kaha seo se tla ba thusa hore sehlopha sa bona se tsebe ho phonyoha selepe.

Haele mokoetlisi oa Bantu, Monghali Motheo Mohapi o boletse hore sehlopha se kene papaling ena se le tlas'a khatello ea hore se lokela ho hlaba lintlha tse ngata, athe ba ne ba sa lokela ho ba be tlas'a khatello, empa ho tsepamisa maikutlo papaling. "Re ile ra leka hoba tlosa monahanong ono, re se ke be ra nka lintlha tsa lihlopha tse ling khahlanong le Members. Ba tsebe hore e ne e le papali ea Members le lihlopha tseo e bapetseng le tsona. Ena ke ea rona le Members eo re tlamehang ho tsepamisa maikutlo ho eona." A rialo.

A re ba bapetse hantle kaha morero e ne e le ho fumana lintlha tseo ba neng ba li hloka empa haele boemong ba ntlafalo ea papali ehlile ha b'a sebetse hantle.

Haele tse ling tse ileng tsa bapala letsatsing la Moqebelo li ile tsa ema tjena: LCS 0-0 Linare, LMPS 0-0 Lifo-fane, Lijabatho 1-0 LUFC, LDF 2-1 Machokha. Ka Sontaha Lioli 0-0 Liphakoe, Matlama 4-1 Manonyne le Maroala 0-0 Majantja.

Nthunya o etela mekhatlo ea bolo

Tšeliso Thakholi

President e ncha ea Mokhatlo oa Lesotho o Tsamaisang Bolo ea Maoto (LeFA), Monghali Lijane Nthunya o qalile tšebetso ea hae ea ho potoloha le Mekhatlo ea Bolo ea Literekeng (Li DiFA), likhoeli li se kae kamor'a hore a khethoe e le eena motsoka sephali ka sepheo sa ho teka kapel'a batsamaisi ba li DiFA meralo ea hae ea tšebetso.

Nakong ea ketelo ea hae literekeng, har'a e meng ea meralo ea hae, President Nthunya o totobalitsa hore ke takatso ea hae ho bona LeFA e kena litumellanong tsa tšebeliso-'moho le linaha tse seng li ena le boiphhelelo papaling ea bolo ea maoto lefatšeng tse kenyeletsang har'a tse ling Germany, Spain le Brazil.

A qetella ka ho bontša hore ntho e sa mo jeseng litheohelang ke khaello ea meaho ea lipapali literekeng naha ka bophara le hore setereke ka seng se loke-la hoba le setsi sa libapali le tšebeliso ea mahlale tse tšoanang le tse fumane-

hang literekeng tsa Leribe, Mohale's Hoek le Maseru e le ho matlafatsa maemo a papali ea bolo kahar'a naha.

Haele mona a se a qalile tšebetso e matla ea ho teka meralo ea hae, har'a e

meng ea eona e mengata eo a neng a e bolelle baphatalatsi ba litaba ngoahola, ke ho tla hlalella likomiti ka litsebo, tse nepahetseng e le hore naha e tle e tsebe ho fumana sephetho se

setle ho latela bakoetlisi ka ho fapakana ha bona. O ne a re ke takatso ea hae ho kenyeletsa meralong ea hae libapali tsa mehleng tse kileng tsa bapalla naha ena ka boitelo le lerato, e le

ho ntlafatsa bolo ea maoto, le ho fumana malebela ho tsoa ho bona, etsoe bohlale habo ahele ntloana-'ngoe.

O ne a tekele baphatalatsi hore o tlii'o sebeletsa hore Komiti e Kholo e Tsamaisang Lipapali tsa Liki (PLMC), e ikemele e le hore e tle e tsebe ho thusa lihlopha tse kholo hore li tlohe boemong boo li leng ho bona li nyolohela maemong a 'professional.' A re ha PLMC e ikemetse sena se tlii'o thusa hore LeFA e tsebe ho tsepamisa maikutlo boikarabellong ba eona ba ho tsoelapele ho ntlafatsa papali ea bolo ea maoto.

A re e 'ngoe e kholo kahar'a meralo ea hae ke ho tla theha liliki tsa bana ba katlase ho lilemo tse 17, ho tsetela haholo tsoelopeleng ea ho holisa talenta ea bacha, ho fana ka lisebelisoa tlasa Lenane le reretsoeng ho otlala talenta ea bana lilemong tse tlase le bitsoang TDS le ho tšehetsa ka matla sekolo sa LeFA se Leribe. Ntlha ea ho qetela har'a tse ngata e bile hore o tlii'o matlafatsa setsoalle le mekhatlo ea lipapali le 'muso e le hore li tšoarane ka matsoho ho holisa papali ea bolo kahar'a naha.

